

豐城縣志卷之一

星野

星官之書有熊肇始土辨保章野詳班氏雲漢下流厥爲星紀南斗所直歷無異指麗屬占候襪祥統視聖代崇隆承庥錫祉垣舍順應山河表裏天廟盛明萬方慶喜瑞首賢良分輝豐水寧獨物華龍劍氣紫志星野

北斗 第四權星

杓攜龍角衡殷南斗

衡斗中央非第五星

魁枕參首用昏建

者杓杓自華以西南夜半建者衡衡殷中州河濟之

豐城縣志

卷一 星野

一

間平旦建者魁魁海岱以東北也斗爲帝車運于中央臨制四鄉分陰陽建四時均五行移節度定諸紀皆繫于斗

史記天官書

布度定紀布州繫象雍屬魁冀屬樞兗青屬機徐揚屬權荆屬衡梁屬開陽豫屬瑤光

張揖廣雅

蒙山以東至南江會稽震澤徐揚之州屬權星大別以東至雷澤九江荆州屬衡星

春秋文耀鉤

北斗第一曰正星二曰法星三曰令星四曰伐星五曰斂星六曰危星七曰部星亦曰應星一主天二主地三主火四主水五主土六主木七主金一主秦二

主楚三主梁四主吳五主趙六主燕七主齊石氏星書

北斗七星四曰權為時主水其分為吳宋史天文志

天樞主秦天璇主楚天璣主齊天權主吳天衡主燕

闔陽主趙瑶光主宋斗綱圖說

天權北斗四星文曲也卦配壬禽位天英門應景門

地分吳分同上

按前後諸天文書載七星屬九州與主七國多不

同獨揚州吳分所屬俱載權星舊志作衡星誤

五星 熒惑

吳楚之疆候在熒惑占于烏衡史記天官書

豐城縣志

卷一 星野

二

赤帝熂怒之神為熒惑立南方春秋文耀鉤

歲星主東嶽徐青兗三州熒惑主南嶽荆揚二州鎮

星主中嶽豫州太白血嶽雍州梁州辰星主北嶽

冀州漢五星總叙

歲星主泰山徐州青州兗州熒惑主霍山揚州荊州

交州鎮星主嵩山豫州太白血華陰山梁州雍州辰

星主恒山幽州并州晉天文別錄

歲星主齊魯東吳青揚徐兗之地熒惑主荆楚川南

荊州衡陽之地鎮星主中州三河梁豫之地太白血

西維秦晉梁雍巴蜀之地辰星主燕趙代幽之地宋史

按漢晉諸書悉載熒惑主揚吳宋史天文志獨言
歲星所主其說互異並存之以備考

三台 司命下星

三台星兩兩而居西近文昌二星曰上台爲司命主
壽次二星對軒轅曰中台爲司中主宗室東二星抵

太微曰下台爲司祿主兵

張衡星經

兗豫屬上台荆揚屬下級

論語擿輔象

三台六星上台上星主兗豫下星主荆揚中台上星
主梁雍下星主冀州下台上星主青州下星主徐州

宋史天文志

豐城縣志

卷一 星野

三

天市垣 東第六星

天市垣二十二星東西列各十一星東垣南第一星
曰宋第二星曰南海第三星曰燕第四星曰東海第
五星曰徐第六星曰吳越第七星曰齊第八星曰中
山第九星曰九河第十星曰趙第十一星曰魏西垣
第一星曰韓第二星曰楚第三星曰梁第四星曰巴
第五星曰蜀第六星曰秦第七星曰周第八星曰鄭
第九星曰晉第十星曰河間第十一星曰河中

宋兩

朝天文志

天市垣二十二星在氏房心尾箕斗宮內東蕃十一

星六曰吳越

宋史天文志

按天文志東第六星屬吳越東第二星則屬南海
豫章吳分距南海尚遠舊志兼列東第二星牽涉
非是

宿 南斗

斗二十五度天廟也亦曰天機五星貫中日月正道
爲丞相太宰之位酌量政事之宜褒進賢良稟受爵
祿又主兵南二星魁天梁也中央二星天相也北二
星天府建也亦爲壽命之期占于南斗星盛明君臣
一心天下和平爵祿行

象緯考

豐城縣志

卷一 星野

四

南斗六星第一主吳二主會稽三主丹陽四主豫章

五主廬江六主九江

石氏新書

角亢氏兖州房心豫州尾箕幽州斗江湖牽牛婺女
揚州虛危青州營室至東壁并州奎婁胃徐州昴畢
冀州觜觿參益州東井輿鬼雍州柳七星張三河翼

軫荊州

史記天官書

吳地斗分野今之會稽九江丹陽豫章廬江廣陵六
安臨淮郡盡吳分也

漢地理志

角亢氏鄭兖州房心宋豫州尾箕燕幽州斗牛女吳
越揚州虛危齊青州室壁衛并州奎婁胃魯徐州昴

畢趙冀州觜參魏益州井鬼秦雍漢柳星張周三河

翼軫楚荊州

晉書

南斗在雲漢下流當淮海間為吳分

唐書天文志

勾吳之區維斗所直半入于楚終蝕于越

黃庭堅語

吳越當天文南斗須女之分

宋史

揚州管斗吳之分野兼得楚及南越之交

杜佑通典

江西南昌府古揚州斗分野春秋戰國時為吳越之

交秦屬九江郡漢置豫章郡

明列郡分野紀

斗六星二十五度吳之分野應天鳳陽蘇州松江常

州鎮江廬州安慶太平寧國池州徽州和州滁州杭

豐城縣志

卷一 星野

五

州廣德州處州南昌饒州廣信南康建昌撫州臨江

吉安瑞州袁州贛州南安牛六星七度吳之分野揚

州淮安湖州温州九江

章世純星次分野

南昌饒州廣信南康建昌撫州臨江吉安瑞州袁州

贛州南安天文斗分野九江天文斗牛分野

明一統志

辰 在丑

一歲日月十二會所會為辰如十一月辰在元枵子

位十二月辰在星紀丑位之類是也然此特在天之

位耳若以地言之則南面而立其前後左右亦有四

方十二辰之位但在地之位一定不易而在天之象

運轉不停惟天之鶉火于地之午位乃與地合而得

天運之正耳朱子十二辰次說

丑位即星紀之次斗牛麗焉漢志

起斗十一度至婺女七度于辰在丑漢志引黃帝分星次

吳越其辰在丑東漢郡國志

丑初起斗九度中斗二十四度終女四度其分野自

廬江九江負淮水之南盡臨淮廣陵至于東海又逾

南河得漢丹陽會稽豫章郡西濱彭蠡南涉越州盡

東南北越之國吳郡志分野說

斗三在寅斗四過丑明過宮圖說

豐城縣志

卷一 星野

六

吳分野斗牛在丑自斗三度至女二度屬吳越分揚

州明分野書

次 星紀

七政終始于斗牛故名星紀廣雅

星紀吳越也元枵齊也娵訾衡也降婁魯也大梁趙

也實沈晉也鶉首秦也鶉火周也鶉尾楚也壽星鄭

也大火宋也析木燕也周禮註

星紀斗牽牛吳分野爾雅

斗十度至女五度為星紀吳越分野屬揚州費直周易說

斗六度至女二度為星紀之次大雪冬至居之吳越

之分野

蔡邕月令章句

自南斗十二度至須女七度爲星紀吳越分野屬揚

州魏太史令陳卓及范蠡鬼谷張良諸葛亮譙周京

房張衡並云

晉書

星紀之次于辰爲丑謂之赤奮若干律黃鐘斗建在

子吳越分野

皇甫謐帝王紀

自斗至須女爲星紀吳越得其分

隋書

星紀得雲漢下流百川歸焉析木爲雲漢末派山河

極焉故分野自南河下流窮南紀之曲東南負海爲

星紀自北河末派窮北紀之曲東北負海爲析木新

豐城縣志

卷一 星野

七

唐書天文志

斗牽牛星紀也初南斗九度餘千四十二秒十二太

中南斗二十四度終女四度自廬江九江負淮水南

盡臨淮廣陵至于東海又逾南河得漢丹陽會稽豫

章西濱彭蠡南涉越州迄蒼梧南海逾嶺表自韶廣

以西珠崖以東爲星紀之分也

同上

江南道蓋古揚州南境漢丹陽會稽豫章廬江零陵

桂陽等郡長沙國及牂牁江夏南郡地潤昇常蘇湖

杭睦越明衢處婺温台宣歙池洪江饒虔吉袁信撫

福建汀漳爲星紀分其名山衡廬茅蔣天目天台會

稽四明括蒼縉雲金華大庾武夷其大川湘瀨沅澧
浙江洞庭彭蠡太湖

新唐書地理志

星紀起斗三度七十六分八十五秒終女二度六分
三十八秒

元郭守敬天文志

南昌瑞州饒州臨江袁州廣信撫州建昌贛州南安
禹貢揚州之域星紀斗分南康九江吉安禹貢荆揚
二州之域星紀斗分

清類天文分野書

古者歷紀日月五星皆起于牽牛之次故曰星紀後
漢郡國志乃自南斗十二度至須女七度爲星紀之
次

章潢星紀說

豐城縣志

卷一 星野

八

斗牛星曰星紀宮曰磨蝎時曰丑州曰揚

十二宮二

十八宿分屬說

南斗牽牛星紀之次初斗十一度外末女七度內于
分爲吳越于辰在丑于野在揚

天文秘訣

星紀舊斗十二度過丑今斗二度過丑

明末經星過
度考

箕三度過丑入星紀之次

萬年新書

按天文內爲三垣紫微太微天市分焉外爲四維
二十八宿分焉北斗乃第一垣紫微帝車秉兼二
十八舍熒惑即北斗所主第三星三台居第二太
微垣天市爲第三垣二十八宿屬天經星分隸于

十二辰次舊志不照天文次序非體而所列星宿辰次尤多謬錯如繫北斗于辰下以七星爲十二辰也繫太微于次下以三垣爲十二次也繫天市垣于宿下以垣星爲二十八宿也豫章記言豫章之地春秋時爲楚之東境據天文則吳之分野屬吳分者天市東第六星而援及東第二星竟以吳爲南海也主揚州者北斗權星而列作衡星又以揚爲荆也若據七國論且以吳爲燕趙也茲悉取而正之并各附引証以便逐類考核焉

九江入斗一度廬江入斗六度豫章入斗十度丹陽

豐城縣志

卷一 星野

九

入斗十六度

晉志州郡躔次

南斗之十度屬豫章

費直星歷

南斗十度爲吳之頭軫十度爲楚之尾

蘇軾辰次圖

九江入牛五度豫章入斗十度彭蠡入翼十五度

于

大吉秘訣

南斗六星全體合距杓爲度今歷家以距魁四星爲

度杓二星入于箕

明天文紀

南斗二十五度每一星得四度一分分之六有奇豫

章起斗十二度六分終十六度六分有奇

唐天文志

豫章入斗七度翼軫非也

西士南懷仁星野說

斗二十五度所分野之地週數千餘里躔度次舍宜有鑿然不爽者考之天文諸書以及各郡舊志類皆沿習異同不能分晰各度乃搜求遺書獲殘卷一帙二十八宿分野之圖說僅存云斗六星二十五度爲吳之分野南昌入斗八度饒州廣信同居七度瑞州三度建昌五度撫州六度吉安九度贛州十二度南康臨江袁州南安俱斗四度而九江則入牛五度雖分郡甚悉然與九江入斗一度豫章入斗十度從前諸家又相徑庭矣豈氣數遷移古今縣隔不相符合一至此乎

江西舊志論

豐城縣志

卷一 星野

十

周禮大司徒以土宜辨十二土未言所辨何土保章氏以星土辨九州未言所辨何星鄭康成乃釋以十二國分配十二次嗣是或繫北斗或繫五星或繫三台天市或繫二十八宿諸家不一漢書分十二次度數最詳魏太史令陳卓更立郡國所入宿度而晉書天文志緣此叅定州郡度法故郡邑舊志咸以晉書豫章入斗十度爲斷夫越不可伐土墨占于星紀晉人是居董固測于實沈星見大辰而宋國火歲淫元枵而楚子凶分野之驗自不敢畧細考唐書山河存于兩戒固知星土以氣相

屬而不係夫方隅可無惑于吳越南而星紀北斗
牛北而謂之揚州矣復徵揚吳往事若唐貞元十
九年熒惑入南斗色如血明年江浙旱宋紹興十
七年熒惑入南斗明年江西盜起二十三年月犯
南斗是歲江西水乾道三年月入南斗魁是歲江
西大水旱豫章屬斗分野信已竊有疑者晉書謂
在斗十度唐書謂起斗十二度四分終十六度六
分西土南懷仁謂在斗七度江西舊志引分野圖
說又謂在斗八度之數說者將孰是而孰非耶姑
就晉志論之已云九江入斗一度廬江入斗六度
豫章入斗十度而所列星紀之次又起斗十二度
終女七度則豫章十度當在析木之津不在星紀
星紀屬吳析木屬燕以吳爲燕可乎又據地球圖
說天三百六十五度餘四之一爲地一週每度約
地二百五十里豫章距九江不越三百里乃至差
九度之多經以江漢則九江南廬江北界以彭蠡
則九江北豫章南由九江一度至廬江六度自南
入北由九江一度至豫章十度又自北入南揆諸
輿地遠近星度順逆抑何大不相協乎按十二次
中分隸二十八宿每次得宿度三十度四十三分

七十五秒北蓋古法而過宮度數古今不同則宋志王奕有曰帝王世紀費直周易蔡邕月令與三統歷殊少或差一二度多至差六七度是行也每歲有差故日月所會之次分度亦異是也王奕又曰二十八宿未始有度不過因日行躔度而假星象著明者以計耳如井斗度濶觜鬼度狹要以日躔相值分之其數多寡于是焉生但赤道天度黃道日度均以各宿分配而兩道度不相等有言宿度當依赤道爲法推黃道不合度或言欲知日月五星之行必先審黃道之度而後可推諸分野及

查各宿本度類多增損亦靡有定今且參觜互易其位多寡懸別其數然則度固不可以膠執者也且二十八宿雖曰經星附天不動未有不與天同運者天運三十歲一小變百年中變五百載大變天官書嘗備言之寧有在天運度與時推遷而郡邑所入之度猶得拘守前經者歟魏晉以來千五百載天運凡三大變占步之家一行王朴郭守敬最著自利瑪竇西法圖出蔑視一切是知一代之法自有一代之見彼瞻異氣于斗牛決寶劍于豐城者不必假之以相橫折矣况我

朝功德際天蟠地上下同流海隅日出罔不率俾幅幘
之廣爲隆古所未有而郡邑舊志乃憑往代偏隅
所測宿度以律之安見其能脗合哉言天文者徒
守甘石遺術而不知變通之數此唐一行之所譏
也要之天道微茫海宇遼絕銖銖寸寸而析焉亦
欲家而反踈耳緣檢豫章十度之說未敢輕于沿
襲故附識于此以俟精究其學者

氣候

附

豐于南郡爲水鄉氣多濕蒸然東北多水西南復多山
寒溫不常物候遲早稍異惟風不暴烈雨以時行則

豐城縣志

卷一 星野

十三

疾疫不作大有年民足衣食春罕三五日恒晴四五
月多大雨雨不止輒河流湍激山溪漫湧壞圩堤深
爲禾稼害秋潦亦然最宜者穀雨小滿夏至立秋日
雨五月二十六日分龍雨十月內霜汁雨凡連日雨
則防水浹旬晴復憂旱亦其地沙多而土薄故也每
夏秋小雨下附郭一帶不住桔槔久晴無雨山農至
鑿深巖尋龍穴十月多晴暖恒數夜霜多少卜來歲
豐歉仲季二冬喜雪不雪來歲虫害稼春寒甚于冬
中夏間多衣綿號映水天秋七八月熱較燥晝熱夜
寒民必患瘡痢歲多風春東風夏西風秋西北風皆

雨徵三月三日前後多狂風雨俗傳爲劍風并稱雙
龍朝故匣桐菊花開後他處半月山鄉栽穫後水鄉
亦半月
星野所屬迤邐遼濶各土一山麓一沮澤寒暖燥濕
不齊以時候其四時而度地制宜居財阜用與斯民
相安于食息起居是有土者之責也爰紀氣候于星
野之末

沿革

虞夏揚州春秋吳楚由秦迄漢屬編郡部縣肇建安名沿晉武析境于南間分隸撫曰富曰豐吳臯謾數遷治維四歷稱有五章水之東為今雉堵永徽以來屹立江滸戶滿升州代更復古千百餘年晏然故土志沿革

淮海維揚州

尚書禹貢

東南曰揚州

周禮職方氏

魯昭公六年楚令尹率師伐吳師于豫章

春秋左氏傳

十三年楚師還自徐吳人敗諸豫章獲其五帥

全上

豐城縣志

卷一 沿革

十五

二十四年楚子為舟師以畧吳疆越大夫胥犴勞吳

王于豫章之汭

同上

定公二年楚囊瓦伐吳師于豫章

同上

四年吳人舍舟于淮汭自豫章與楚夾漢夫槩王以

其屬五千先擊之楚師亂吳人大敗之

同上

江水又東逕郢城南又東得豫章口

桑欽水經

按豫章五見春秋傳杜預注江北淮水南地能改

齋漫錄謂在江左者有其地而非郡在江南者

江兩

俱大江以南故建為郡而非春秋時之地其說當

江西統稱江南

矣嘗考昭公六年楚伐吳師于豫章次于乾谿吳

人敗之于房鍾乾谿即今鳳陽亳州房鍾即今壽州蒙城是時楚都郢師于江北之豫章道出今之鳳陽亳州吳人逆之敗于今之壽州蒙城水陸兩道俱順安有東入吳地師于今江西豫章之理即此一條他條皆可例見更詳昭公四年吳舍舟于淮汭自豫章與楚夾漢孔穎達江疏引漢書地理志云豫章郡名在江南此則在江北者穎達淹通博雅夫豈有悞又宋武帝討劉毅遣王鎮惡先襲至豫章口去江陵城二十里史稱豫章去江陵只二十里則春秋時之豫章瀕楚而在江夏之間無疑傳疏史冊鑿鑿不知各志何故引以爲證且考郡在春秋時並無豫章名漢高祖五年穎陰侯灌嬰定九江郡秦名郡曰九江見郡松陽門右有樟樹高七丈五尺許大二十五圍枝葉扶疎蔭庇數畝漢官儀謂豫章生庭中高帝取以名郡郡之得名實自此始顧以春秋時之豫章冒爲漢時建郡之豫章斷斷難信郡之人文財賦實甲東南原不必援古爲重故不得不辨

春秋屬吳地 十道志

戰國屬楚 太平寰宇記

豐城縣志

卷一 沿革

十六

周元王三年越滅吳 左氏傳

顯王四十六年楚威王伐越大敗越殺王無疆盡取

其地 史記越世家註

按通鑑楚滅越在三十五年與此異

秦為九江郡 十道志

始皇二十三年王翦擊荆滅之虜荆王負芻二十六

年分天下為三十六郡注九江郡其一也 始皇本紀

漢為豫章郡 十道志

高帝五年潁陰侯灌嬰渡江定豫章郡 漢書

豫章郡領縣十八其一曰南昌 同上

豐城縣志 卷一 沿革 十七

莽曰九江 同上

揚州刺史部豫章郡二十一城一曰南昌 後漢書郡國志

建安中孫權據吳析南昌南境置富城縣 輿地廣記

按治建于富水之西故名富城址在今富城鄉縣

之建自此始

晉武帝泰康元年移治豐水之西改曰豐城 同上

按治即今滎塘雷煥得寶劍于此豐之得名自此

始

梁武帝大同二年析豐城之東境另置廣豐縣建治富

水之東隸巴山郡 太平寰宇記

按巴山郡即撫州崇仁廣豐縣址距今治二十里許即所稱故縣地

隋文帝開皇九年罷巴山郡併豐城入廣豐縣初隸撫州後屬洪州同上

按洪州即豫章陳武帝時改爲洪州

仁壽二年避煬帝諱復名豐城名勝志

煬帝大業十二年林士弘陷豫章縣治廢輿地廣記

唐高祖武德五年復置豐城縣隸洪州同上

高宗永徽二年移豐城治章水之東今之治所自此始豐水志

豐城縣志

卷一 沿革

十八

按章貢合而爲贛章當作贛

昭宗天祐二年梁王朱全忠以父名城改豐城爲吳

臯南昌府志

後唐同光元年復改吳臯爲豐城同上

宋太祖開寶八年曹彬下江南得州十八豐城屬焉宋史

註

元世祖至元二十三年以豐城戶滿五萬陞爲富州元史

按省志陞富州在十四年與此異

明洪武二年復改富州爲豐城縣名勝志總叙

皇清因之編戶三百五十四里安志

按邑實編戶三百二十五里

豐城古無分地總曰揚州漢立豫章郡領縣十八
豐在南昌壤內建安十五年孫權據吳乃析南昌
縣南境置富城縣建治富水之西在今四坊富城
鄉其時城郭未完人民未集未及七十年至晉武
帝泰康元年特命遷治豐水之西改名豐城即今
滎塘地更歷五代蕭梁以縣大難治大同二年因
割縣之東境另置廣豐縣即今故縣地別隸撫州
總管府巴山郡隋文帝罷巴山郡併豐城入廣豐
縣仍隸洪州滎塘縣治遂廢大業十二年林士弘

豐城縣志

卷一 沿革

十九

陷豫章郡廣豐之治又廢閱卷帝二年迄唐高祖
武德四年縣以擾攘而廢者凡六年至五年復置
豐城縣暫寄廣豐殘治高宗永徽二年方自廣豐
移置今之治所自後別無遷易元時陞爲富州明
復改爲豐城俱仍現治考晉建治之在滎塘者尚
歷三百九十餘年而蕭梁所置廣豐之在故縣者
則不過百二三十年而已縣之建置始末如此俗
有謂今縣基爲晉郭璞所卜及治內水道俱其開
導者殊爲訛錯璞懷帝永嘉間人旋爲王敦所害
時滎塘之縣治纔建去唐永徽數百餘年安有已

死之人相隔六朝復活爲卜城開渠于今縣治之事又朱溫父五經名城因避諱改縣爲吳臯亦祇改名未改地俗傳曾建吳臯縣于黃金城者全無考據併傳富城縣原在黃金城者尤不察黃金城在章水之西富城建于富水之西因以命名之故生斯長斯互相承謬以致方輿府省諸志輾轉譌誤茲特詳著其原委蓋桑梓必恭之誼云爾

疆域

維天有垣維地有域九宅奠基揚州界秩壤開洪都
豐爲壯邑分率縱橫準望曲直章水背潨臨江首翼
撫則東遮瑞乃西訖若犬牙錯如錦繡織四大夙稱
歷世彌飭人文蔚興靈氣蕃殖志疆域

縣界

東一百里抵楊塘距楊塘五十里即撫州臨川縣治
東南一百里抵黃蘗嶺距黃蘗嶺四十里即崇仁縣治
南一百一十里抵丁山嶺距丁山嶺八十里即樂安縣
治

豐城縣志

卷一 疆域

二十一

西南四十里抵龍池舖距龍池舖五十里即臨江府清
江縣治

西七十里抵馬鞍山距馬鞍山三十里即瑞州府高安
縣治

西北四十五里抵堯峰嶺距堯峰嶺七十五里即會省
新建縣附郭治

北五十里抵殷家渡距殷家渡七十里即南昌縣附郭
治

東北七十里抵辜家渡距辜家渡九十里即進賢縣治
東西廣二百一十九里南北袤三百二十八里

京師陸路四千三十四里水路四千一百二十五里

形勝

邑稱壯哉縣一旦紫氣騰蹕上薄斗牛而物華天寶人

傑地靈益翕然炳煥宋徐鹿卿

邑為吉贛下流地勢窪甚春夏水暴至滙為巨澤縣兀

然居中宋劉德秀

南渡以來以豐為緊縣豐水志

章水經北曲江滙東帶二水之交流襟三江之長雄豐

水賦

洪都壯邑厥水維豐池山躍龍芙蓉浴日劉卿月

豐城縣志 卷一 疆域 二十二

縣為本府壯邑山時水環土沃人庶弘治志

邑在江西與南昌臨川安福號名四大明舒芬

豐城古澤國也當五郡之水衝明李瑄

邑界五郡之間東連錦汝西攢梅峯羅山峙其南贛江

環其北豐乘

宋元分鄉法計都八十九為里一百七十

登仙鄉凡七都 梅仙鄉凡三都

劍池鄉凡七都 長樂鄉凡三都

長安鄉凡四都 奉化鄉凡三都

折桂鄉凡四都 會昌鄉凡四都

長寧鄉 凡八都

富城鄉 凡四都

大順鄉 凡六都

廣豐鄉 凡六都

正信鄉 凡十都

長豐鄉 凡四都

宣風鄉 凡八都

興仁鄉 凡四都

歸德鄉 凡四都

明分坊法 計都八十八都半為里三百六十六

一坊 凡九都計圖四十 二坊 凡二十一十六都計圖四

三坊 凡一十五都計圖四 四坊 凡一十六都計圖三

五坊 凡十都計圖四十 六坊 凡七都計圖四十三

七坊 凡五都半計圖四十八坊 凡五都計圖三十九

豐城縣志 卷一 疆域 二十三

九坊 凡五都計圖三十九

按邑舊有廩一十七明洪武十八年改為區曰在城區所屬三十五里登仙區所屬二十三里劍池區所屬二十八里長樂區所屬二十四里半長安區所屬五里會昌區所屬二十八里富城東區所屬七里富城西區所屬九里正信區所屬三十三里廣豐區所屬二十三里半長豐東北區所屬十四里長豐西南區所屬十五里長豐西北區所屬十二里宣風東區所屬二十五里宣風西區所屬二十一里歸德南區所屬十八里歸德北區所屬

十八里置以責催科尋廢附記于此

豐自建邑及遷今治里區都圖晉唐無可稽考歷宋暨元置鄉一十有七都圖隸焉登仙鄉梅仙鄉劍池鄉在縣之西長樂鄉在縣之西偏長安鄉奉化鄉富城鄉在縣之南會昌鄉長寧鄉在縣之東南折桂鄉大順鄉廣豐鄉正信鄉在縣之東宣風鄉在縣之北長豐鄉興仁鄉歸德鄉在縣之西北明洪武二年改爲八坊天順年間復酌劑之增爲九坊城曰坊下鄉曰圖下一坊地在城者縣治之西一里許在鄉者一都至九都二坊地在城者縣治之西河街在鄉者十

豐城縣志

卷一 疆域

二十四

都至二十五都三坊地在城者縣治之西偏仙音巷在鄉者二十六都至四十都四坊地在城者縣治之北門半里許在鄉者四十一都至五十六都五坊地在城者縣治之南三百步在鄉者五十七都至六十都六坊地在城者居縣治中在鄉者六十七都至七十三都七坊地在城者縣治之東二百步在鄉者七十四都至七十八都零半都八坊地在城者縣治之東一百步在鄉者七十九都至八十三都九坊地在城者縣治之東一里餘在鄉者八十四都至八十八都詳考分坊之法一坊統登仙全鄉析梅仙鄉三

之二爲都九爲圖四十二坊得梅仙鄉三之一統劍池長樂長安三全鄉析奉化鄉三之一爲都一十五爲圖四十九三坊得奉化鄉三之二統折桂會昌二全鄉析長寧鄉八之五爲都十五爲圖四十二四坊得長寧鄉八之三統富城大順二全鄉析廣豐鄉五之三爲都十六爲圖三十九五坊得廣豐鄉五之二析正信鄉十之八爲都十爲圖四十六坊得正信鄉十之二統長豐全鄉析宣風鄉八之一爲都七爲圖四十三七坊得宣風鄉八之六爲都五都半爲圖四十二八坊得宣風鄉八之一析興仁鄉五之四爲都

豐城縣志

卷一 疆域

二十五

五爲圖三十九九坊得興仁鄉五之一統歸德全鄉爲都五爲圖三十九大約宋元爲里一百七十至明增爲三百六十六其分合多寡不同者或以俗便或以時易生齒有盛衰土宇有盈縮以步稽地以地定役肥饒不獨樂堯堉不獨苦調役均財酌盈劑歉春秋之義也故存其舊以備後人之考覈

按此疆彼界古志之矣是疆域之中實爲民力所普存豐有疆域自應度地居民稽民就役然非因時損益則苦樂仍不均矣

國家鼎運方新無廢不舉順治八年

勅部檄所在均差何尹士錦仰承

德意斟酌籌畫仍倣舊制繫都于坊繫圖于都繫甲于圖

編都八十八都半圖三百二十有五較宋元多一

較明少四里茲據所定詳列如左

一坊

一都 一圖 二圖 二圖 二都 一圖 二圖 三圖 四圖

三都 一圖 二圖 三圖 四圖 四都 一圖 二圖 四圖

五都 一圖 三圖 四圖 五圖 六都 一圖 二圖 三圖 四圖

七都 一圖 二圖 三圖 八都 一圖 二圖 三圖

九都 一圖 二圖 三圖

豐城縣志

卷一 疆域

二坊

十都 一圖 二圖 十一都 一圖 二圖

十二都 一圖 二圖 三圖 十三都 一圖 三圖 四圖 五

十四都 一圖 二圖 十五都 一圖 二圖

十六都 一圖 十七都 一圖 二圖

十八都 一圖 二圖 十九都 一圖 二圖 三圖

二十都 一圖 二圖 二十一都 一圖 二圖

二十二都 一圖 二十三都 一圖 二圖

二十四都 一圖 二圖 三圖 二十五都 一圖 二圖 三圖

三坊

二十六都 一圖 二十七都 一圖 二圖

二十八都 一圖 二圖 三圖 二十九都 四圖 五圖 三圖

三十都 一圖 二圖 三圖 四圖 三十一都 四圖 二圖 三圖

三十二都 一圖 二圖 三圖 三十三都 一圖 又一圖

三十四都 一圖 二圖 三十五都 一圖 二圖

三十六都 一圖 二圖 三十七都 一圖

三十八都 一圖 二圖 三十九都 一圖

四十都 一圖 二圖 三圖

四坊

四十一都 一圖 二圖 四十二都 一圖

豐城縣志

卷一 疆域

二十七

四十三都 半圖 二圖 四十四都 一圖 二圖

四十五都 一圖 二圖 三圖 四十六都 一圖 二圖

四十七都 一圖 二圖 四十八都 一圖

四十九都 一圖 二圖 三圖 五十都 一圖 二圖

五十一都 一圖 二圖 三圖 五十二都 一圖 二圖

五十三都 一圖 二圖 三圖 五十四都 一圖 二圖

五十五都 一圖 二圖 三圖 五十六都 一圖 二圖 三圖

五坊

五十七都 一圖 二圖 三圖 五十八都 一圖 二圖

五十九都 一圖 二圖 三圖 六十都 一圖 二圖

六十一都 二圖 三圖 六十二都 一圖 二圖 三圖

六十三都 九圖 增十圖 三圖 四圖 五圖 六圖 七圖 八圖

六十四都 四圖 五圖 三圖 六十五都 四圖 二圖 三圖

六十六都 一圖 二圖 三圖 四圖 五圖

六坊

六十七都 四圖 二圖 三圖 六十八都 四圖 五圖 六圖

六十九都 四圖 二圖 三圖 七十都 一圖 二圖 三圖 五圖

七十一都 一圖 二圖 三圖 四圖

七十二都 一圖 二圖 三圖 四圖 五圖 六圖 七圖 九圖

七十三都 一圖 二圖 三圖 四圖 五圖 六圖 七圖 八圖

豐城縣志

卷一 疆域

七坊

七十四都 一圖 二圖 五圖 六圖 九圖

七十五都 一圖 三圖 四圖 五圖 六圖 七圖 九圖 十二圖

七十六都 一圖 二圖 三圖

七十七都 一圖 二圖 三圖 四圖 五圖 六圖

七十八都 一圖 二圖 三圖 四圖 五圖 六圖 七圖

八坊

七十九都 二圖 三圖 五圖 六圖 七圖 八圖

八十都 一圖 二圖 三圖 四圖

八十一都 八圖 二圖 三圖 四圖 五圖 六圖 七圖

八十二都 一圖 二圖 四圖 五圖 六圖 七圖 八圖

八十三都 一圖 二圖 三圖 四圖 五圖 六圖 七圖 八圖

九坊

八十四都 一圖 二圖 三圖 四圖 六圖 七圖 八圖 九圖

八十五都 一圖 三圖 五圖 六圖

八十六都 一圖 二圖 三圖 四圖 五圖 六圖 七圖 八圖

八十七都 一圖 二圖 三圖 四圖 五圖 六圖 七圖 八圖

八十八都 一圖 二圖 三圖 四圖 五圖 六圖 七圖

八十半都 一圖 二圖

豐乘曰侯國胙封儉于百里閱豐壤土眊侯國而四

豐城縣志

卷一 疆域

二十九

之而役者常不滿其三問其故曰彼籍絕矣曰如某者逋租而竄也如某如某者以役繁流徙四方者也夫地大而不耕非其地也民不著于土非其民也務治者貴來遠而邇且攜焉林林赤子使之輕其鄉土棄其隴墓轉而之四方以墟吾疆予甚慨焉是故均圖以濟虛毋失所便弛征以平瘵毋易所宜愛境內者宜究心焉

豐巨邑也疆域廣輪約數百里而土瘠民貧役繁賦重則又疲邑也

國初編地均差用蘇積困厥仁普矣迺星紀僅閱八十

餘年而圖甲之殘缺即至十之三四既由避徭抑緣
戶絕顧不是之思恤而又蹙之毋乃不可乎夫以三
百二十五里之中催科是責隄夫是須揆諸公旬三
日二日之義已自有間而復重之以包歇窘之以隸
胥蚩蚩編氓安在而不幾于頓也我

朝

聖聖相承洞悉民苦凡所隱痛盡舉而瘳之而小民亦自
激義相率糾里中爲義圖賦分十限按月走輪底冬
十月輒爲報完追呼不煩齎歛不費食德既至奉公
益勤斯豈非上以子撫下而下即以父母戴上之明

豐城縣志

卷一 疆域

三十

徵耶故民安于土則不棄土土容乎民則無憚民君
子讀盤庚之誥而知疆之所以域民讀子輿氏人和
之篇又知域民之不僅在于疆也由此義而深之則
鞏茲疆域獨吾豐也歟

山川

大氣融結流峙形成蔚然以秀淵然以清萬千氣象
若送若迎孰文孰幹不一其名羅峯劍水夙表豐城
巒層嶂疊澗曲溪橫俯仰拱揖繞抱環縈聯絡地脉
孕毓竒英志山川

治東

櫛山距縣六十里高三百餘丈產櫛木巔有磐石平敞
可坐百人徐孺子讀書臺在焉舊有龍澤寺智度院
宋紹興間胡文定公父子寓此

桃花巖在櫛山讀書臺西石屋容百人中有石床無斧

豐城縣志

卷一 山川

三十一

鑿跡巖上多桃花縣泉滴瀝清曠爲一山之勝

三角山距縣六十里與櫛山上下聯峙狀如三髻故名
相傳浮邱王郭三仙嘗往來於此

佛嶺距縣七十里在櫛山之北近有招雲嶺鄉人望其
頂之出沒以驗晴雨

鍾城山距縣四十里有景福觀前爲城岡山下有瀑泉
數十泓大旱不竭傳有龍伏其下仙人以塔鎮之又
前爲冀山

鳳凰山距縣七十里在櫛山之南晉昇平四年鳳凰將
九雛於此故名

鵠仙山距縣九十里俗傳晉有道人金冠氅衣誦經於此後乘黃鵠飛昇鄉人立廟祀之

龍門山距縣八十里相傳馬祖道一駐錫於此前爲七寶峰下有龍湫

道人山距縣八十里在龍門山西北馬祖嘗駐錫於此旁有孝感泉

治東南

堯山距縣一百里上有堯壇有小亭置木像被袞冕號爲古帝豐水志一名冕山

連珠嶺距縣八十里高低聯絡如珠故名

豐城縣志

卷一 山川

三十二

迴峰山距縣九十里上爲敷山北爲兩髻山爲上界嶺爲中界嶺

白馬山距縣三十里相傳晉有三神乘白馬于此鄉人祀之

治南

羅山距縣八十里原名池山其巔有池冬夏不竭晉羅文通學道於此故改名羅山高二十七里週迴百九十里跨撫洪吉三州之境端秀穠麗自省譙望之如初出芙蓉亭亭江水按太平廣記山有石人在社公陂鄉浴者置垢衣臂上天大雷雨折臂石人徙山畔

人異之共立祠焉

歐石巖在羅山境幽絕巖上石如龍首有泉懸滴出舌
間巖下有石洞廣可二尺許昔有人執燭行數里風
勁燭滅而返莫窮其底

猴峰距縣七十里尖秀聳拔一名猴尖爲學宮文筆峰
始豐山距縣七十里高三百丈道書第三十七福地晉
仙人文蕭吳綵鸞煉丹於此有藥臼二洗藥石池一
池旁石上有虎馬犀牛跡東旁石壁有白玉蟾影及
手書石上有仙人掌棋枰棋子山有仙林觀南唐徐
鍇爲記其事

豐城縣志

卷一 山川

三十三

栢山距縣一百里形如覆栢周廻百里豐邑地勢發脉
于此上有金牛池

黃金嶺距縣八十里旁爲蘆峰山又上爲雷峰山

治西南

孤山距縣九十里由玉笥綿亘而來按祥符經又名澄
山下有泉水澄徹土人取爲麩紅如丹砂

金華山距縣六十里祠祀王郭上有斗壇禱求輒應

陀頭山距縣三十里高五十丈周廻八里

治西

梅仙嶺距縣二十里原名盛山又名飛鴻山漢南昌尉

梅子眞嘗遁跡於此後以修鍊飛昇立觀崇祀因名密嶺距縣十五里又名仙姑嶺上有招雲石劍跡石下有密泉雙石眼瀉出清冽香美

望城岡距縣五里登其上縣城即見

赤岡山距縣二十里一名黃金城朱子過此有詩又二十里爲金墉山

按山微有土城故址相傳舊建吳臯縣考朱梁時避諱改豐城爲吳臯仍屬今治是改名並未改地也又考元至元間移劍江驛於此尋廢前志以建驛爲建縣殊誤

豐城縣志

卷一 山川

三十四

治西北

烏石岡距縣四十里許旌陽曾煉丹於此以劍屬泉泉水流丹

南神嶺距縣四十里原名清潭嶺自荷山分脉至此聳特嶺有祠曰南神故名

雷王嶺距縣六十里高三百餘丈鄉人迎賽與南神同剪綵爲月眠燈費最靡左爲鵝飛嶺前有折弓壇舊傳許旌陽逐鹿於此殪其母而子隨之遂折弓焉中有懸履觀與雷公嶺雷婆嶺遙對興雲佈雨每不後時

馬鞍山距縣七十里亦自荷山而來延袤百餘里狀如馬鞍巉巖險崎邑人陸叔祥鑿石開道其上

治北

龍頭山距縣十里蜿蜒如龍昂首爲縣下流砥柱山多石少土有兩磯與水激故又名磯山上有曲江亭三賢祠祀朱子及寓賢姚雪坡邑賢李義山明提學李夢陽作記康熙初改龍山書院巔建文昌閣登其上一望無涯

感山距縣十里山勢平衍江流環抱上有海慧寺多名勝士大夫每遊覽其地又五里爲老蛤石二十里爲

豐城縣志

卷一 山川

三十五

鰕魚嶺

堯峰嶺距縣四十里界隣新建上有堯帝殿莫詳其所自始舊傳洪水時不沒故名明嘉靖間南昌張鏊有記

治東北

大神山距縣三十五里舊有演教寺旁爲迴歸嶺石勢嶙峋

龍嶺距縣四十五里其近山爲伏嶺爲金牛峰爲月嶺劍水自章貢達虔吉會宜春江入于清江繞邑折而西北逕會省滙于彭蠡合于荆江章源發于聶都貢源

發于陳石二水會流故曰贛西北過桐江則吉州諸水會焉又東逕清江則秀江淦淦諸水會焉邑當五水之衝中流一線如劍脊故名劍江春夏洪漲勢甚湍峻

豐水源發永豐界出栢山歷長安長樂遶劍池迤邐約一百五十里舊由長樂港入江每春漲水逆爲患明永樂間耆民楊長和疏請設隄障之導其流入三溪津達中溪環邑南與富水會至小港入劍江

富水源自羅山歷角陂雙乘橋沅江至石灘與豐水合遶故縣達吳城與槎溪水合至小港入劍江

豐城縣志

卷一 山川

三十六

雩韶水自撫盱經邑而東入于劍江俗呼撫河

槎溪發源猴峰西流經黃金橋入文江過黃沙達烏石岡約五十里至赤石昌溪左埠又四十里與富水合入劍江晉太守范甯得靈槎于白石墓移載沉此故名

隱溪東流經湖茫溫沙墪合雩韶水達鄔家渡至大港口入劍江

杭溪一自介山一自清潭中歷洪石至此達藥湖又合錦水入劍江

曲江邑北十里形如半月中分三潭岸旁市鎮村落繚

繞榆柳薄晚波平如盪金碧水鄉佳處

化龍潭邑西南七十里歲旱禱雨多應舊傳有龍居其中

龍湫在龍門山下衆峰坳處內有蟄龍積雨枯旱水無消長中有石色深黑可作硯

藥湖縣北五十里周迴四十餘里舊傳許旌陽經此水蛭粘其馬足遂投藥湖中水蛭盡絕故名

百斤湖縣東十里約廣百餘頃溉田五百餘頃

株湖縣東十五里舊係學湖約長十餘里溉田千餘頃

銅湖縣東二十五里上通豐富二水下接撫河綿亘三

豐城縣志

卷一 山川

三十七

十里

蓮花湖縣西五里昔多蓮故名溉田百餘頃

赤湖縣東二十里廣約二三里溉田五百餘頃

蛟湖縣西南十五里約長五里溉田二百餘頃

坪港湖縣南城外邑內水自斗門閘出鍾聚於此并接

富豐二水溉田二百餘頃

敖家湖縣西城外廣袤百畝今名官湖魚利歸儒學外爲敖家壩內爲裏壩最要害

楊柳湖縣登仙門外廣袤百畝濱裏壩最爲要害

龍潭湖縣東門外里許溉田百餘頃

滎塘縣西南二十五里南北兩區周廻十里溉田五百餘頃旁有舊縣治廢址今爲滎塘市

篠塘縣東三十里周廻五里餘堰之則深數尺溉田百頃

蓮塘縣東二十里廣百五十餘畝溉田三百餘頃

新塘縣東三十里廣二百餘畝秋冬不竭溉田百餘頃

灣塘縣東四十里地名甘塘廣五畝溉田五百餘頃

尚塘縣西三十里廣百餘畝溉田六百餘頃

磨盤洲在南門外坪港湖側三面濱水舊傳古有常覺

仙原塋斗門閘及開閘乃舉石墪遷葬於此至今人

豐城縣志

卷一 山川

三十八

不敢犯上有祠塑其像

楊梓洲縣西岸二十五里唐贈司空李承勳戰死葬此

屢著英靈墓側有廟

苦竹洲縣西南十里許舊多竹今成膏壤梁將歐陽頎

嘗軍子此

白洲縣北十五里爲邑水口上多種瓜橘植李樹萬餘

株結實十餘種花時一望如雪爲春遊勝觀

三洲在縣北小港外瀕江上楊林中金鷄下牛宿古讖

云三洲相連必出狀元頻歲春水溢入小港泥淤尺

餘三洲將合爲一

龍霧洲邑北四十里有上洲中洲下洲袤二十里望之
烟霧蒼茫故名洲爲劍水富水豐水所會萬歷間建
塔未果存有塔基或曰三洲連指此左有螺螄石屹
立水中若砥柱春漲瀾漫沒入不見舟行甚懼
青腦洲新生洲烏土洲楊盤洲青翼洲皆邑之拱衛若
疊嶂然

豐城縣志卷一終

豐城縣志

卷一 山川

三十九